



13-07-2015

Broj: 01-02-1-396/15
Sarajevo, 09.07.2015. godine
(ZB)

BOSNA I HERCEGOVINA
MINISTARSTVO CIVILNIH POSLOVA
SARAJEVO

PREDMET: Mišljenje o Nacrtu Zakona o neradnim danima u vrijeme vjerskih praznika u Bosni i Hercegovini

Ured za zakonodavstvo Vijeća ministara Bosne i Hercegovine, razmotrio je **Nacrt Zakona o neradnim danima u vrijeme vjerskih praznika u Bosni i Hercegovini** i na osnovu člana 25. stav 1. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), daje

MIŠLJENJE

Ustavni osnov za donošenje predmetnog Zakona sadržan je u članu II 3.g) Ustava Bosne i Hercegovine, prema kojem sva lica na teritoriji Bosne i Hercegovine uživaju ljudska prava i slobode iz stava 2. ovog člana, što uključuje i slobodu misli, savjesti i vjere, kao i članu IV 4.a) Ustava Bosne i Hercegovine, prema kojem je Parlamentarna skupština Bosne i Hercegovine nadležna za donošenje zakona potrebnih za provođenje odluka Predsjedništva Bosne i Hercegovine ili za vršenje funkcija Parlamentarne skupštine prema Ustavu Bosne i Hercegovine.

Prema naprijed navedenom, potrebno je da se u obrazloženju nacrta zakona ustavni osnov za donošenje, uskladi sa ustavnim osnovom datim u ovom mišljenju.

Predmetnim Zakonom utvrđuju se neradni dani u vrijeme vjerskih praznika u Bosni i Hercegovini i primjenjuju se na sve zaposlene u Bosni i Hercegovini. Propisano je po pet neradnih dana za muslimane, za pripadnike katoličke vjere, za pripadnike pravoslavne vjere, za pripadnike jevrejske vjere i za pripadnike ostalih vjera, koji se računaju kao plaćeni radni dani.

Uz dostavljeni tekst zakona, dostavljena su i mišljenja nadležnih organa entiteta, kao i dopisi Međureligijskog vijeća u Bosni i Hercegovini sa aktima religijskih zajednica, s tim što katolička crkva nije kontaktirana jer je to pitanje riješeno Osnovnim ugovorom između Bosne i Hercegovine i Svete Stolice i Dodatnog protokola na Osnovni ugovor („Službeni glasnik BiH“, broj 10/07).

Na dostavljeni tekst Nacrta Zakona o neradnim danima u vrijeme vjerskih praznika u Bosni i Hercegovini, Ured za zakonodavstvo daje sljedeće sugestije:

- u preambuli, u uvodnom dijelu, uraditi određene korekcije, tako da preambula glasi:
„Na osnovu člana IV 4.a) Ustava Bosne i Hercegovine, ...“;
- u članu 2. upotrebu brojeva, primijeniti na način kako je to propisano članom 45. Jedinštvenih pravila za izradu pravnih propisa u institucijama Bosne i Hercegovine („Službeni glasnik BiH“, br. 11/05, 58/14 i 60/14);
- u članu 5. stavom (2) propisano je da se određene odredbe Zakona o radu u institucijama Bosne i Hercegovine („Službeni glasnik BiH“, br. 26/04, 7/05, 48/05, 60/10 i 32/13) usklade sa predmetnim zakonom, ali imajući u vidu da je Zakon o radu u institucijama Bosne i Hercegovine sistemski zakon (lex generalis), a predmetni zakon je posebni zakon (lex specialis), ukazujemo da se sistemski zakon nemože usklađivati sa posebnim zakonom, već se usklađivanje može raditi samo na način da se posebni zakoni usklađuju sa sistemskim zakonima.

Takođe, Ured za zakonodavstvo ukazuje da se o tekstu nacrta zakona pribave mišljenja Ministarstva pravde Bosne i Hercegovine i Ministarstva finansija i trezora Bosne i Hercegovine.

